



AKCIJA ČARLI Pretresi u Cazinu i Velikoj Kladaši Carinici i špediteri “pali” zbog uvoza polovnih vozila

Tokom pretresa u ilegalnom skladištu u Velikoj Kladaši pronađena roba vrijedna 500.000 KM, a koja se trebala prodati na crnom tržištu u BiH

Sedam specijalnih istražnih timova koje su činili inspektori **SIPA-e** i službenici UIO BiH jučer ujutro su počeli s akcijom “Čarli” koja za cilj ima razbijanje organizovane kriminalne grupe koja se bavila nezakonitim uvozom, krijumčarenjem, krivotvorenjem dokumentacije, te nezakonitim skladištenjem i utajama PDV-a.

U sklopu ove akcije u Cazinu i Velikoj Kladaši pretreseno je 14 lokacija i tom prilikom je pronađena roba vrijednosti 500.000 maraka. Ona je otkrivena u jednom ilegalnom skladištu u Velikoj Kladaši, a trebala se prodati na crnom tržištu u BiH.

-Ovo su prvi rezultati akcije Čarli koja je provedena po nalogu Suda i Tužilaštva BiH - kažu u UIO BiH.

Kako saznajemo, među uhapšenim osobama nalaze se i dvojica službenika Uprave za indirektno oporezivanje BiH zaposlena u carinskoj ispostavi u Velikoj Kladaši, te vlasnici nekoliko špediterskih firmi.

Oni se sumnjice da su duži vremenski period nezakonito uvozili polovne automobile,



U akciji učestvovalo sedam specijalnih istražnih timova

rezervne dijelove i druge robe u BiH, izbjegavajući plaćanje PDV-a i drugih dadžbina, a sve s ciljem stjecanja protivpravne imovinske koristi.

Kako je saopćeno iz

UIO BiH, u ovoj akciji je učestvovalo njihovih 20 službenika koji su bili raspoređeni na izuzimanju dokumentacije iz četiri špediterske kuće koje su provodile carinske postupke

uvoza putničkih vozila koja su carinjena u Carinskoj ispostavi Velika Kladaša.

-Sumnja se da je u carinskim postupcima umanjivana vrijednost vozila koja je predstavljala osnovicu za naplatu uvoznih dadžbina, te su tako naplaćene manje uvozne dadžbine od zakonski predviđenih u postupcima carinjenja ovih vozila - pojasnili su u UIO BiH.

Dosadašnjim istražnim radnjama utvrđeno je da su određene osobe iz inostranstva privremeno uvozile automobile na stranim tablicama, koje bi potom ostavljali na autootpadu, skidali im te tablice, odjavljivali vozila u inostranstvu, a zatim ih prodavali u dijelovima na “crnom tržištu” u BiH. Na taj način je oštećen budžet BiH jer nisu plaćane zakonski predviđene uvozne dadžbine prilikom uvoza vozila u BiH.

U Tužilaštvu BiH jučer su kratko kazali da je meta aktivnosti bilo ukupno sedam pravnih i fizičkih osoba, te da će osumnjičeni biti privedeni na saslušanje, nakon čega će se odlučiti o daljim aktivnostima.

Z. Đ.